

LISTOVI...

GRAČANIČKI GLASNIK
časopis za kulturnu historiju

Broj 50
Godina XXV
Novembar, 2020.
[str. 179-193]

© Monos 2020

LISTOVI...

Listovi gračaničkog kalendara od 5. 6. do 22.11.2020.

Prof. dr. Omer Hamzić

5. 6. 2020.

Gračanica: Proglašen prestanak stanja nesreće uzrokovane pojavom pandemije, izazvane korona virusom

Tu je odluku donio Gradonačelnik na prijedlog Gradskog štaba civilne zaštite koji je procijenio da je epidemiološka situacija na području grada i dalje povoljna i zadovoljavajuća, što je, kako je rečeno, "rezultat odgovornog odnosa svih subjekata i građana". Dužnost građana je da i dalje poštuju mjere zaštite i spašavanja koje ostaju na snazi i koje su u skladu sa važećim naredbama (nošenje maske, socijalna distanca, dezinfekcione mjere i sl.), dok će javne službe (Dom zdravlja, civilna zaštita, inspekcije i dr.), kao i ostali poslovni subjekti (preduzeća i ustanove) pojačati svoje aktivnosti na provođenju i poštivanju važećih mjera i naredbi.

7. 6. 2020.

Hrabri dječak Mehmed Šabić iz Gračanice dobio priznanje "Večernjakov pečat" u kategoriji "Uspjeh godine"

Prije nešto više od dvije godine taj je dječak, poznat i po nadimku "Meho Beton", kod svoje kuće u Gračanici doživio tešku nesreću u kojoj je prilikom eksplozije zadobio gotovo smrtonosne vanjske i unutrašnje opekotine, na više od 65 posto tijela. Ljekari su mu davali samo jedan posto šanse da će preživjeti. Izdržao je 18 operacija i uspješno "istrčao maraton". Veliki pobjednik. "Idite do kraja", poručio je u svom kratkom obraćanju prilikom dodjele nagrade (Gračanički ba)

10. 6. 2020.

Novo povećanje broja nezaposlenih na evidenciji Biroa za zapošljavanje Gračanica

Po službenim podacima Biroa za zapošljavanje radi se o povećanju za 28 nezaposlenih osoba u maju u odnosu na april.

Trenutno je na spisku 7313 nezaposlenih, od čega je 4637 je žena. U strukturi nezaposlenih 2871 je kvalifikovanih i 424 sa fakultetskom diplomom. Zdravstveno osiguranje koristi 4421, a novčanu naknadu 236 osoba. To je drugi mjesec zaredom u kojem se bilježi povećanje nezaposlenih. Posljedice pandemije itekako pogađaju privredu.

8-9. 6. 2020.

U olujnom nevremenu na području Tuzlanskog kantona najteže pogođena Gračanica, Lukavac i Srebrenik.

Na području Gračanice najviše je stradala Miričina i dijelom Donja Orahovica. U Miričini je poplavljeno dvadesetak stambenih objekata, koji su bili pogođeni poplavama i 2014. godine. Narednog dana, u nevremenu su stradali i zapadni dijelovi gradskog područja, a najviše Lukavica. Predstavnici lokalne vlasti izašli su na teren i obećali pomoć za najugroženije. Prve procjene govore o ogromnim štetama

11. 6. 2020.

Nakon kratkotrajnog zatišja, opet se povećava broj zaraženih – pokrenuta procedura za proglašenje stanje epidemije u TK

Otvaranje granica, znatno ublažavanje mjera, ali i slobodnije ponašanje građana koji preporuke kriznih štabova u velikoj mjeri nisu poštovali, u proteklom danima dovelo je do znatnog širenja korona virusa. Na području Tuzlanskog kantona trenutno je aktivno 70 pozitivnih slučajeva na korona virus, koji je, kako se gotovo panično saopštava, ušao u zdravstvene ustanove, rudnike, obdaništa te privatne firme. Epidemiolozi prognoziraju da će u narednim danima broj zaraženih povećavati. Ministrica zdravstva Tuzlanskog kantona Dajana Čolić potvrdila je da su pozitivni slučajevi potvrđeni među zaposlenicima Univerzitetskog kliničkog centra u Tuzli, Domu zdravlja u Živinicama, te ambulanti Dubrave. Zaraženih ima i među za-

poslenicima Rudnika mrkog uglja Banovići, Rudnika Đurđevik, Rudnika soli u Tuzli, Rudnika Kreka, te Rudnika Šikulje. Lukavacka Cementara također se nalazi na listi kompanija sa pozitivnim slučajevima, kao i "Elin motors" u Živinicama. Pozitivni slučajevi otkriveni su i u dva obdaništa u Tuzli – "Kolibri" i "Pčelica". Stoga je iz preventivnih razloga obustavljen rad svih javnih obdaništa u Tuzli. Kantonalni krizni štab Ministarstva zdravstva Tuzlanskog kantona pokrenuo je proceduru proglašenja epidemije... Inače, od 27. marta do danas u Tuzlanskom kantonu je korona virusom zaraženo 158 osoba, a tri su preminule. (Izvor: Klix.ba)

11. 6. 2020.

Dijalizni centar Opće bolnice u Gračanici: od 15 aparata, za 11 istekao rok upotrebe

To je u izjavi za portal "Kliks" potvrdio vršilac dužnosti direktora Opće bolnice Šemsudin Okanović: "Mi trenutno imamo četiri nova aparata za hemodijalizu, dok su ostali zastarjeli i potrebno ih je zamijeniti. Iako su njihovi radni sati istekli, oni trenutno funkcionišu, ali nikada ne znamo kada će prestati sa radom. Zbog toga ih je potrebno zamijeniti. Životi pacijenata trenutno nisu ugroženi, ali svakako da je njihova zabrinutost opravdana". Od četiri nova aparata koja je spomenuo Okanović, tri su nabavljena prošle, a jedan ove godine i to sva četiri doniranim sredstvima. Koncem prošle godine iz ove ustanove upućen je zahtjev Vladi TK za nabavku nove medicinske opreme u toku 2020., a na listi su i aparati za hemodijalizu. Istovremeno su građanski aktivisti, skupa sa dijaliznim pacijentima putem medija poručili da je više neprihvatljiva praksa da bolnica uređaje dobija posredstvom donacija. Jer, građani su više umorni od humanitarnih pomoći, prikupljanja donacija i slično. Vrijeme je da vlast konačno radi svoj posao. Inače, u Dijalizni centar u Gračanici trenutno dolazi

49 pacijenata iz Gračanice, Gradačca, Srebrenika, Lukavca i Doboj Istoka. (izvor: Klix.ba)

12. 6. 2020.

Korona i dalje prijeti: najnovije mjere Kriznog štaba Ministarstva zdravstva Tuzlanskog kantona

Nakon ukidanja stanja prirodne nesreće u FBiH, došlo je do masovnog nepoštivanja mjera nošenja zaštitne maske i socijalne distance, te slabljenja naređenih mjera kontrole od strane nadležnih organa u javnim institucijama, privrednim i drugim subjektima, došlo je do naglog pogoršanja epidemiološke situacije i na području Tuzlanskog kantona. Na dan 12. 6. 2020. godine na JZU UKC Tuzla preminula je jedna pacijentica starije životne dobi sa komorbiditetima, dok se jedna muška osoba mlađe životne dobi nalazi na respiratoru. Shodno preporukama Svjetske zdravstvene organizacije, koje kao najznačajniji faktor u borbi protiv daljeg širenja oboljenja navode socijalnu distancu i nošenje zaštitne maske, Krizni štab Ministarstva zdravstva Tuzlanskog kantona donio je i niz drugih mjera i zaključaka s ciljem suzbijanja zaraze, te pozvao sve građane i pravna lica da ih se strogo pridržavaju

19. 6. 2020.

Nova oprema u gračaničkom vodovodu – za uredno snabdijevanje vodom i u najekstremnijim uslovima

Zahvaljujući stalnom unapređenju gazdovanja i kontinuiranoj nabavci najsavremenije opreme, Javno preduzeće "Vodovod i kanalizacija" Gračanica odavno je postalo lider u svojoj branši po smanjenju gubitaka u vodovodnoj mreži i kontinuiranom snabdijevanju građana vodom za piće. Zato se Gračanlije mogu pohvaliti da godinama unazad ni u vremenu najvećih suša nisu imali nikakvih ograničenja u snabdijevanju vodom. Da bi zadržali takav trend, u gračaničkom vodovodu nastavljaju sa opremanjem i osavremenjavanjem svog rada i poslovanja. Na-

kon što su uspostavili automatsku kontrolu i podešavanje pritiska i potpuni daljinski nadzor nad stanjem u mreži, započeli su i sa instaliranjem vodomjera sa daljinskim očitavanjem. Nabavljena je i visokosofisticirana oprema za detektovanje kvarova i nadzor mreže. Vrijednost opreme je oko 150.000 maraka a sredstva su obezbijedili Fond za okoliš Federacije BiH 50% i Vodovod Gračanica 50%. "Bržim lociranjem kvarova, gubici će biti puno manji, a teški fizički poslovi će biti svedeni na minimum", izjavio je za Radio Gračanicu Samer Ilijazović, šef održavanja JP "Vodovod i kanalizacija" (Izvor: Radio Gračanica)

22. 6. 2020.

Preminula Hadžija Grbić (u 74. godini života) – prva profesorica tjelesnog odgoja u Gračanici

"Još kao djevojčica, ušla je u svijet sporta. Prvo kao član gimnastičke sekcije, a kasnije kao vrsna rukometašica. Bila je član i kapiten ženske ekipe RK "Bratstvo" Gračanica, a svoj doprinos je dala u radu veteranki ŽRK "Gračanica". Ljubav prema sportu odvodi je na Fakultet sporta u Sarajevu kojeg uspješno završava i tako je postala prva žena profesorica tjelesnog odgoja u Gračanici. Bila je vrsni pedagog i ostavila dubok trag u nastavi tjelesnog odgoja u gračaničkim školama. Prema svojim učenicima i mladim sportistima koje je trenirala odnosila se kao prema svojoj djeci", rekao je povodom smrti svoje kolegice, dr. sc. Osman Bukvić, predsjednik Sportskog saveza Gračanica. Profesorica Hadžija ukopana je 23. 6. 2020. na mjesnom groblju Režići.

25. 6. 2020.

Širenje pandemije u BiH se ne smanjuje: do sada najviše zaraženih u jednom danu, situacija najgora u Tuzlanskom kantonu

Kako prenose mediji, "stigili" smo do najvećeg broja zaraženih u toku 24 sata od početka pandemije. U našim uslovima, 119 pozitivnih

i troje umrlih, u odnosu na broj stanovnika isto je kao 4.500 pozitivnih i 120 umrlih u Njemačkoj. Situacija u Tuzlanskom kantonu još gora. U istoj paraleli 29 zaraženih i dvoje umrlih na TK je na nivou 5.800 zaraženih i 400 umrlih u Njemačkoj. U svakom slučaju, situacija nije dobra, a bit će još gora ako se ništa ne bude poduzimalo na suzbijanju pandemije. Vlasti često upućuju apele građanstvu tražeći ozbiljniji odnos prema pandemiji. No, čini se da su i građani u situaciji da apeluju na vlasti da ozbiljnije pristupi identificiranju, testiranju i izoliranju svih slučajeva zaraženi, te praćenju i stavljanju u karantenu njihovih kontakata. (Iz teksta S.M. Tuzlarije.net)

26. 6. 2020.

Otvoren desetodnevni Kućni sajam "Kovan 2020"

"Nova kriza nam je uvjetovala nove modele poslovanja, ponašanja i razvoja. Kako smo svi tradicionalno naučili sajam Grapos-expo je bio mjesto okupljanja koji, nažalost, ove godine nismo bili u mogućnosti organizovati u Gračanici, odlučili smo da tradiciju nastavimo i napravimo našu verziju sajma", rekao je u svom pozdravnom obraćanju na "Kućnom sajmu" Said Karalić, direktor firme Eko line "Kovan". Otvaranju ove privredne manifestacije prisustvovali su brojni poslovni partneri i prijatelji firme "Kovan", lokalni privrednici, te predstavnici lokalnih i kantonalnih vlasti (predsjednik Vlade TK Denijel Tulumović i gradonačelnik Gračanice Nusret Helić), koji su se obratili prigodnim riječima i čestitali organizatoru na ovom dobro osmišljenom susretu privrednika u uslovima pandemije. Nakon otvaranja, gosti su obišli proizvodne pogone "Kovana" i upoznali se sa novitetima u proizvodnji kao što su dezinfekcioni tuneli, oprema za proizvodnju obnovljivih izvora energije, odnosno elektromotornih pogona, mašina za usitnjavanje drveta i pelet presa, te alata svjetski renomiranih proizvođača Siemens, Bruks, Andritz i drugi.

30. 6. 2020.

Održana 14. sjednica Gradskog vijeća Gračanica: dodjela stipendija, "odrada" pripravničkog staža, odluke iz oblasti urbanizma i građenja...

Među 19 tačaka, inače obimnog dnevnog reda usvojeno je i nekoliko izvještaja gradske administracije (o radu Gradskog pravobranilaštva, o realizaciji planiranih kapitalnih investicija, o provedenim mjerama poticaja u poljoprivredi, o radu vijeća mjesnih zajednica, gradske inspekcije, o odlaganju i odvozu smeća, zbrinjavanju napuštenih životinja i o stanju putne infrastrukture na gradskom području. Usvojeni su i izvještaji o radu i finansijskom poslovanju javnih preduzeća "Komus" i "Vodovod i kanalizacija", te na kraju i Informacija o realizaciji odluke o izmjeni propisa grada Gračanica s ciljem obezbjeđenja pomoći za ublažavanje posljedica pandemije COVID-19

3. 7. 2020.

Dijaliznom centru Opće bolnice u Gračanici uručeno pet dijaliznih aparata

Dijaliznom centru Opće bolnice u Gračanici uručeno pet dijaliznih aparata – donacija Gračanlije Fuada Purača, koji već dugo živi u Australiji i ne zaboravlja svoj rodni grad. Donaciju je uručila Fuadova bratična Elvedina Omerović, koja živi u Sarajevu. O donaciji i donatoru iz njenog prigodnog obraćanja izdvojili smo sljedeće rečenice: "Moj amidža Fuad Purač živi 52 godine u Australiji, za te 52 godine nikada nije dolazio u svoj rodni grad, ali on značajno pomaže već dugi niz godina i Gračanlije i prijatelje i članove porodice. Ovo je samo jedna u nizu njegovih akcija, akobogda, ne i posljednja, koju smo mi zajedničkim snagama u vrlo kratkom roku realizovali. Pročitili smo da su našem hemodijaliznom centru potrebni aparati, da se ljudi pate, da im je teško, tako da mislim da su došli u pravo vrijeme i na pravo mjesto i u prave ruke." Svoje zadovoljstvo i zahvalnost,

prilikom uručjenja donacije, izrazili su i pacijenti i članovi menadžmenta bolnice, koji očekuju nabavku još 4 dijalizna aparata za što se već vode određene aktivnosti. Od gospođe Omerović usput smo saznali da Fuad Purač želi uskoro da sagradi džamiju na Ritašićima, mahali u kojoj se rodio i odrastao... (Izvor: Radio Gračanica).

5. 7. 2020.

Prvi BiH Art Forum u Historijskom muzeju u Sarajevu: predstavljene četiri najuspješnije inicijative

Manifestaciju su organizovali mladi umjetnici iz Bosne i Hercegovine i dijaspore, a idejni tvorci Manifestacije su Mirela Kulović iz Bostona (porijeklom iz Gračanice) i student režije i filma Bahrudin Srebrenica iz Malmö. U organizacionom timu su se našla i druga imena s naše javne scene: Nikola Burić, direktor i-Platform iz Berna, Husnija Ćoralić, glumac iz Tuzle, Srđan Čalija, pedagog iz Sarajeva, Vanja Šunjić, novinarka iz Doboja, Tomislav Tadić, pravnik iz Tuzle, Aldin Vrskić, pedagog iz Zenice, Aida Suljaković, spisateljica i umjetnica iz Bazela i Mirna Omerčaušević, producentica iz Sarajeva. U sadržinskom dijelu "Foruma", Marina Đapić predstavila je *Street Arts Festival* Mostar, Mak Hubjer Galeriju *Brodac*, Aida Šarac *Plavi Artizam* (projekt pod okriljem Umjetničke Galerije BiH) i Jasminko Halilović *Muzej Ratnog Djetinjstva*. Kako je objasnila slikarica Mirela Kulović, BiH Art Forum je zamišljen kao platforma za umjetnike i kulturne radnike, koja bi se organizirala jedan puta godišnje. Utemeljena je na dva ključna cilja: jedan je susret mladih umjetnika i razmjena iskustava, a drugi – uključivanje najmlađih umjetnika u kreativni proces.

23. 7. 2020.

Gračanički "Zeka komerc" otvorio svoj baucentar u Sarajevu – peti po redu

Preduzeće je osnovano 1995. godine i od tada konstantnim ulaganjem, proširuje obim svog

poslovanja u prodaji alata, rasvjete, građevinskog, elektro, vodo i materijala za centralno grijanje. Svoje prodajne centre, osim Gračanice, ima još u Tuzli, Gradačcu i Zenici. Iako je dominantno trgovačka, ova firma je prije tri godine počela i sa proizvodnjom kamina na čvrsto gorivo i kotlova za centralno grijanje. Novootvoreni bau centar u Sarajevu je peti po redu i imat će prepoznatljiv "Zekin" asortiman roba u kojem će kupcima biti omogućena kupovina "sve za dom na jednom mjestu". Kao i ostali "Zekini" prodajni centri, zapošljavat će nekoliko desetina radnika. Skromna svečanost povodom otvaranja prodajnog centra u Sarajevu održana je uz poštivanje svih propisanih epidemioloških mjera.

25. 7. 2020.

Završena regulacija Sokoluše na dionici od kružnog toka do mosta nizvodno od Tehničkog pregleda "Lido"



To je, ustvari, dio projekta koji se u papirima gradske administracije službeno zove "Zaštita glavnog desnog kolektora kroz izgradnju regulacije korita rijeke Sokoluše-faza II". Radi se o prilično zahtjevnim radovima na nekih 145 metara korita rijeke. Upravo na tom dijelu rijeka se često izljevila i činila štete okolnim stambenim i poslovnim objektima. Završetkom ovih radova ta opasnost svedena je na minimum, a osim toga taj dio grada je znatno uljepšan i ekološki sreden.

Ukupna vrijednost izvedenih radova iznosi 386.505,07 KM. Izvođač je firma "Roding" doo, Gračanica, a projekat je finansiran sredstvima Vlade Švicarske u okviru MEG projekta kojeg provodi UNDP BiH, sredstvima Fonda za zaštitu okoliša Federacije BiH, te iz Budžeta Grada Gračanica.

3. 8. 2020.

Korona: loše stanje i u Gračanici

Kako je saopšteno iz Doma zdravlja Gračanica, na području Gračanice korona virusom zaražena je 21 dok se u izolaciji nalazi 75 osoba. Stanje se, ipak, drži pod kontrolom.

3. 8. 2020.

Obrtnička radnja "Šivaona Ibro" iz Donje Orahovice donirala 400 višekratnih pamučnih maski Civilnoj zaštiti i Domu zdravlja Gračanica

Donacija će biti iskorištena za kampanju podizanja svijesti građana o ulozi i važnosti nošenja zaštitnih maski kao vidu poštivanja mjera zaštite od virusa COVID-19. Inače, radnja je nedavno aplicirala i dobila grant sredstva preko Ambasade Republike Slovačke u BiH za podršku malim obrtima iz kojih je nabavila osam novih mašina za šivenje koje su uveliko poboljšale proizvodne kapacitete i unaprijedile ponudu tog obrta.

7. 8. 2020.

Obilježen 7. avgust, Dan pobjede na Visu, jedan od najvažnijih datuma u novijoj historiji Gračanice

Program obilježavanja, nešto skromniji nego ranije (zbog pandemije), počeo je u popodnevnom satima polaganjem cvijeća na Centralno spomen obilježje u Gračanici, a zatim polaganjem cvijeća na Spomenik poginulim borcima u Babićima, te nastavljen na platou Visa, gdje je i održana centralna manifestacija. Prisustvovalo je nešto manje građana, preživjelih boraca, članova porodica poginulih, te predstavnika boračkih organizacija, lokalnih vlasti. Na spomen obilježje bitke na

Visu, delegacije su položile cvijeće, uz prigodna obraćanja i skroman kulturno-umjetnički program. Kako su zbog aktuelne situacije sa epidemijom organizatori bili prisiljeni reducirati ovogodišnji program obilježavanja i otkazati neke tradicionalne manifestacije, Radio Gračanica je emitovala specijalno pripremljene programske sadržaje u povodu tog značajnog datuma.

7. 8. 2020.

Zbog pogoršanja epidemiološke situacije, Gradski štab CZ Gračanica donio nove mjere, zaključke i upozorenja

Upućen je apel svim privrednim subjektima, obrtnicima, ustanovama, udruženjima građana i svim drugim subjektima da pojačaju mjere samozaštite i poštuju naredbe i preporuke svako iz svog djelokruga rada u cilju sprečavanja širenja zaraze. Zahtijeva se od JZU Doma Zdravlja da se shodno novonastaloj situaciji organizuje i pojača rad Higijensko-epidemiološke službe, a od Opće bolnice "Dr. Mustafa Beganović" da bude spremna odgovoriti svom zadatku u slučaju pogoršanja stanja. Preporučuje se građanima da izbjegavaju veća javna okupljanja, proslave i mjesta na kojima se ne može obezbijediti fizička distanca. Obavezuju se nadležne inspekcije Gradske uprave i policijski službenici PU Gračanica da pojačaju nadzor nad provođenjem naredenih mjera i preporuka Kriznog štaba Federalnog ministarstva zdravstva.

12. 8. 2020.

U Hemodijaliznom centru Opće bolnice u Gračanici još 5 novih aparata

Ovoga puta to je donacija Vlade Norveške implementirana posredstvom UNDP u vrijednosti od 100.000 KM. Na ovoj vrijednoj donaciji su se posebno zahvalili hemodijalizni pacijenti, koji dolaze iz 5 gradova i općina: Gračanice, Gradačca, Srebrenika, Lukavca i Doboj Istoka. Sticajem sretnih

okolnosti, za nepuna dva mjeseca, računajući i prethodnu donaciju, Hemodijalizni centar u Gračanici dobio je 10 novih aparata i sada je, vjerovatno jedan od najbolje opremljenih u Bosni i Hercegovini.

18. 8. 2020.

Potvrđena imena tri kandidata za gradonačelnika Gračanice na lokalnim izborima, koji su zakazani za 15. 11. 2020.

Navodimo imena abecednim redom: Mirsad Čamdžić (kandidat Naše stranke), dugogodišnji novinar Radio Gračanice, zastupnik Naše stranke u Federalnom parlamentu, Nusret Helić (kandidat SDP) dugogodišnji načelnik i sadašnji gradonačelnik i Davud Zahirović (kandidat SDA), stomatolog i uspješan poduzetnik u oblasti farmaceutske industrije, vlasnik fabrike lijekova "Zada" u Lukavcu (izvor: Radio Gračanica)

19. 8. 2020.

Optimistička poruka: svi učenici u Tuzlanskom kantonu se vraćaju u školske klupe

U Ministarstvu obrazovanja i nauke Tuzlanskog kantona odlučni su u tome da djecu vrate u školske klupe. S obzirom na epidemiološku situaciju, u prethodnih više od mjesec dana su zajedno sa epidemiolozima nastojali da iznađu najbolje rješenje za povratak tradicionalnoj nastavi. Po usaglašenom konceptu, mlađi učenici koji prate razrednu nastavu (od prve do četvrte godine) će svaki dan biti u školskim klupama s tim da će njihovi časovi biti skraćeni, potvrdila je ministrica obrazovanja i nauke TK Fahreta Brašnjić. Ukoliko među njima bude brojčano većih razreda, onda će biti podijeljeni u dvije grupe. Stariji učenici, od petog razreda osnovne pa do posljednje godine srednje škole će, kako je objasnila ministrica, pratiti nastavu po kombinovanom modelu (Tuzlarije. net).

21. 8. 2020.

Korona: zasjedao Štab civilne zaštite Grada Gračanica – velike obaveze zdravstvenih ustanova, nove mjere i apeli...

Usvojeno je više preporuka i zaključaka, među kojima izdvajamo ponovni apel da se dosljedno sprovode već naređene higijensko-epidemiološke mjere, koje se, usljed neodgovornosti i neozbiljnosti mnogih, u posljednje vrijeme masovno krše i ne primjenjuju. Zato se od Policijske uprave i inspekcijских službi zahtijeva da pojačaju rad i kontrolu poštivanja naredbi i preporuka, te da prema prekršiocima, osim upozorenja i preventivnih mjera, poduzimaju i izriču propisane kazne. Zaključeno je da se hitno "ide" na formiranje i opremanje laboratorije za testiranje u Općoj bolnici Gračanica (PCR tehnika), da se stvore uslovi za kadrovsko jačanje timova porodične medicine, higijensko-epidemiološke službe i hitne pomoći u Domu zdravlja, kao i odgovarajućih službi u Općoj bolnici, kako bi se obezbijedilo dosljedno provođenje nadzora nad pacijentima u kućnoj izolaciji, uključujući posjete i telefonske kontrole. Menadžment Doma zdravlja zadužen je da organizuje cjelodnevni rad službi (24 sata), koje će pružati zdravstvenu uslugu i podršku COVID-19 pozitivnim pacijentima. Koristeći postojeće smjernice, iskustva drugih kao i dosadašnju praksu, zaključak je da se odmah utvrde konkretne procedure i postupci kod smrtnih slučajeva od Covida u kući, te procedure sahrane, pri čemu treba uključiti i Islamsku zajednicu Gračanica.

24. 8. 2020.

Školska godina u Tuzlanskom kantonu ipak neće početi 1. septembra kako je prvobitno planirano...

...već 7. septembra, uz određena pravila i smjernice, a u skladu sa epidemiološkom situacijom uslovljenom koronavirusom, saopštilo je Ministarstvo obrazovanja i nauke

Tuzlanskog kantona. Za sve škole su obezbijedene dovoljne količine dezinfekcionih sredstava, kao i poseban model pohađanja nastave za učenike koji boluju od hroničnih oboljenja i one, čiji roditelji smatraju da njihova djeca zbog koronavirusa ne trebaju pohađati nastavu u školskim klupama.

25. 8. 2020.

Kompanija "Kovan" iz Gračanice završava izgradnju fabrike peleta u Portugaliji (grad Castelo Branco)

"Kovan" je već potpisao ugovor sa kompanijom "David Calaveiras Madeiras Tratadas" kao investitorom, vrijedan milion eura. Inače, ukupna investicija u fabriku "teška" je pet miliona eura. Sa spomenutim investitorom, "Kovan" je već ugovorio isporuku kompletne linije za proizvodnju drvenog peleta, kapaciteta tri tone na sat, a sve po principu "ključ u ruke", izjavio je za Klix.ba Damir Babić, voditelj projekta. Inače, "Kovan" posjeduje vlastitu fabriku za proizvodnju drvenog peleta u Olovu, koja je glavni ispitni centar za svu opremu i tehnologiju u proizvodnji peleta. (izvor: Klix.ba)

31. 8. 2020.

Održana 15. sjednica Gradskog vijeća Gračanica:

Održana 15. sjednica Gradskog vijeća Gračanica: ozbiljni podbačaji u Budžetu za prvih 6 mjeseci "korona godine", zabilježen privredni rast u prošloj godini, niko ne zna šta će biti u ovoj... Pad privrednih aktivnosti zbog pandemije i svih mjera koje su uslijedile nakon njenog izbijanja, krajem februara i početkom marta, i u ovoj lokalnoj zajednici uzrokovao je, u prvom redu, drastičan pad budžetskih prihoda, ali i svih ostalih parametara. Ukupno ostvareni prihodi i primitci u prvom polugodištu 2020. iznose 6.393.013 KM, što je manje za 3.064.591 KM ili 33,80 % u odnosu na plan. U drugom polugodištu se očekuje dalji pad prihoda "jer smo, kako je rečeno na Vijeću, " donijeli neke mjere kojima smo

pomogli obrtnike i oslobodili ih nekih dadžbina." Sve u svemu, ovo će biti teška budžetska godina i u Gračanici. Iako prezentirana informacija o privrednim aktivnostima na području Grada u 2019. nije izazvala pažnju "nikoga", u ovom kratkom osvrtu iz nje izdvajamo nekoliko ključnih ekonomskih parametara. U materijalu je promatrano 449 poslovnih subjekta koji su ostvarili *ukupan prihod* u iznosu od 818,149 miliona KM, koji je u porastu je za 1,97 % u odnosu na 2018. godinu, a za 10,09 % u odnosu na 2017. godinu. U dvije vodeće djelatnosti ostvareno je čak 77,85 % ukupnog prihoda privrede Grada i to: u prerađivačkoj industriji 49,77 % i trgovini 28,08 %.a. U 2019. godini u privredi je iskazana ukupna dobit od 62,140 miliona KM (62,660 miliona KM dobiti, a 520 hiljada KM gubitka). Iskazana dobit povećana je za 7,56 % u odnosu na 2018. godinu, za 7,3 %, u odnosu na 2017. godinu, a čak za 29,44 % a u odnosu na 2016. g. Ukupna zaposlenost u privredi Grada u 2019. godini porasla je za 6,73 % u odnosu na 2018. godinu, za 10,34 % u odnosu na 2017. godinu, a za 13,4% u odnosu na 2016. Ovi podaci ukazuju na pozitivne trendove u privredi Gračanice u godini prije korone. S obzirom na posljedice pandemije, ko zna kad će biti ponovljeni ili u nekom optimističnom promatranju premašeni. Zato su ovdje i pribilježeni – kao osnova za neke buduće analize..

1. 9. 2020.

Obilježen Dan 111/221 gračaničke brigade

Ovoga puta krajnje skromno i u skladu sa porgoršanom epidemiološkom situacijom. Nakon prigodnih obraćanja, delegacije boračkih i drugih organizacija i lokalnih vlasti odale su poštu i položile cvijeće na Centralnom spomen-obilježju odbrambeno-oslobodilačkog rata (1992. – 1995.) u Gračanici. Svečanost je završena kraćim kulturno-umjetničkim programom.

4. 9. 2020.**Rekonstrukcija spomen-obilježja u Pribavi (kod Gračanice)**

U iščekivanju da se završe radovi na izgradnji dječije igraone, u ovom naselju krenulo se u realizaciju još jednog manjeg projekata. Riječ je o generalnoj rekonstrukciji spomen obilježja poginulim borcima-šehidima i civilnim žrtvama rata (1992. – 1995.), koje je podignuto prije dvadesetak godina i vremenom pretrpjelo znatna oštećenja. Namjera je da se izvrši kvalitetna sanacija kako i dolikuje takvim objektima. Inicijalna sredstva u iznosu od 1.500 KM donirao je Grad Gračanica, a procjene su da će za završetak radova biti potrebno ukupno 3.000 KM. Razliku će obezbijediti mještani i Mjesna zajednica (izvor: Gradska uprava).

14. 9. 2020.**Umro Mustafa – Musto Hasić (Huseinov), ugledni privrednik i aktivista iz Malešića**

Rođen je 1941. godine u višečlanoj imućnoj porodici hadžije Huseina u Malešićima, gdje je završio osnovnu školu. Iako je ostao u selu da se bavi zemljoradnjom na porodičnom imanju, još kao mladić pokazivao je izvjesne poduzetničke sklonosti, posebno za trgovinu. Nakon odlaska vojnog roka, šezdesetih godina, organizovao je odlazak velikog broja radnika i nezaposlene omladine na sezone poljoprivredne radove u okolini Osijeka, gdje je sklopio brojna poznanstva sa istaknutijim privrednicima iz "onog" vremena. Dugogodišnji je radnik Zemljoradničke zadruge u Sjenini (područje Doboja). Nekoliko godina pred rat otvorio je privatnu trgovačku radnju. Potom je nabavio prvu mašinu i otvorio radionicu za preradu plastike, iz koje će se, zahvaljujući njegovoj velikoj upornosti, iskustvu i ranije stečenim poznanstvima, razviti danas moćna gračanička firma za preradu plastike "Variplast", koju danas vodi njegov sin Mujo. Još u predratnom, pa i ratnom, a posebno u poslijeratnom periodu, Musto se isticao kao

vodeći aktivista u organima mjesne zajednice Malešići, društveni radnik, ugledni džematijski... Bio je predsjednik Odbora za izgradnju džamije u Malešićima, poznat je kao donator i pomagač mnogih kulturno-sportskih akcija na općini/gradu Gračanica, te vrijedan humanitarni radnik. Ukopan je 15. 9. 2020. u mjesnom greblju Malešići.

15. 9. 2020.**Asfaltiranje, asfaltiranje: Miričina (Kurtovići, Željeznička stanica)**

Asfaltirana je dionica puta dužine 230 metara u naselju Kurtovići. Preostalo je asfaltiranje još 115 metara na tom putu, kojim bi se Miričina spojila sa Rašljem. Završena je i druga faza sanacije dionice puta M-4 – Željeznička stanica, dužine 88, a širine 5 metara. Vrijednost radova za oba projekta je cca 37.000 KM. (Izvor: Gradska uprava)

17. 9. 2020.**Asfaltiranje, asfaltiranje: Babići (dionica Borici – Babići)**

Asfaltirana je dionica dužine 260 i širine 4 metara puta. Ukupna vrijednost radova je oko 30.000 KM. U Gradskoj upravi u toku su pripreme za asfaltiranje još nekoliko lokalnih puteva i ulica na području Grada.

22. 9. 2020.**Kompanija “Širbegović” Gračanica – AB montažna konstrukcija za COVID bolnicu u Beogradu**

Ugovoreno je učešće u izgradnji kompleksa poluintenzivne njege za Kovid bolnicu na vojnom kompleksu “Zemun ekonomija” u Beogradu. Objekat je površine 6.400 kvadratnih metara i spratnosti P+3 etaže. Predviđena je montaža nosivih stubova iz jednog komada, primjena AB grede i PPS prefabrikovane ploče, visokih preformansi, što u gradnji skraćuje rokove i omogućava relativno brz prelazak u njene naredne faze. Upravo u borbi sa vremenom, prefabrikovana konstrukcija pokazala je svoje prednosti i pružila mogućnost brzog djelovanja na gradilištu. Investitor spomenutog projekta u Beogradu je Ministarstvo odbrane Republike Srbije. Završetak i otvaranje objekta predviđeno je za 1. 12. 2020. godine. Inače, tokom proteklog ljeta ljeta i jeseni, ova renomirana gračanička firma, uprkos pandemiji, radila je gotovo punim kapacitetom, uglavnom na montaži AB konstrukcija na proizvodnim objektima u više gradova Bosne i Hercegovine: na prodajnom objektu “Bingo” u Tuzli, na dva proizvodna objekta u poslovnoj zoni u Gračanici – “Mirna” i “Plasteks”, na dva poslovna objekta u Banja Luci i jednom poslovnom objektu u Tomislav Gradu, kao i u Republici Sloveniji, na poslovnom objektu u Slovenskoj Bistrici, površine 15.000 kvadratnih metara. Očekujući da će ispuniti plan za ovu, u Kompaniji “Širbegović” intenzivno rade na ugovaranju poslova za sljedeću godinu. (Izvor: veb stranica “Širbegović”).

24. 9. 2020.**Miričina: uprkos krizi i znatno smanjenom Budžetu, planirani komunalni projekti uspješno se realizuju**

Već su završeni radovi na projektu izgradnje kanalizacione mreže u naselju Barakovići. U prvoj etapi rješava se odvodnja otpadnih

voda i fekalija za 5 stambenih i jedan poslovni objekat, a u drugoj etapi za 7 stambenih i jedan poslovni. Projekat se radi u dva pravca, a finansira se sredstvima Budžeta Grada Gračanica, ukupne vrijednosti od oko 11.000 KM. Njegovim završetkom neće više biti ugroženo tridesetak objekata ispod magistralnog puta i znatno će se poboljšati ekološki uslovi za život u tom dijelu naselja. Osim ovog, u Miričini je pokrenut još jedan komunalni projekat. Riječ je o vodosnabdijevanju zaseoka Brda, odnosno uvezivanje korisnika sa novoizgrađenim bazenom u dužini od 1.300 metara i izgradnji nove linije u dužini od ukupno 2.000 metara. Uz sredstva koja su uplatili građani na ime priključaka za vodu, nije izostala ni pomoć Gradske uprave za vodovodne instalacije u iznosu od 4.000 KM.

30. 9. 2020.**Održana 16. sjednica Gradskog vijeća Gračanica: digitalni katastar, poboljšanje vodosnabdijevanja Gračanice...**

Vrijedna pažnje je Odluka o usvajanju Programa izrade digitalnog katastra komunalnih uređaja za grad Gračanica koja je usvojena jednoglasno. Realizacijom Programa uspostavlja se digitalni katastar komunalnih uređaja za područje Grada Gračanica koji će prikupljati podatke o komunalnim uređajima i na najsavremeniji način vršiti njihovu distribuciju i pružanje podataka. Na sjednici su razmatrana i dva izvještaja (o realizaciji lokalnog akcionog plana zaštite životne sredine grada Gračanica (LEAP) za 2019. godinu i Izvještaj o primjeni Zakona o uslovima i postupku legalizacije bespravno izgrađenih građevina), koji su usvojeni jednoglasno. Vijećnici su pohvalili i “primili k znanju” sljedeće informacije: o realizaciji projekta “Poboljšanje sistema vodosnabdijevanja i proširenje sistema kanalizacione mreže na području grada Gračanica”, o zbrinjavanju napuštenih i izgubljenih životinja (pasa litalica) na području grada Gračanica i informaciju o sta-

rim i iznemoglim licima u stanju socijalne potrebe na području grada Gračanica (Izvor: Gradska uprava).

30. 9. 2020.

Pronađeni ostaci glinenih cijevi starog vodovoda u Drafničima, jednoj od najstarijih mahala Gračanice.

Na te ostatke je naišao je Emir Tuholjak dok je sa sinom Mirsadom u svom dvorištu kopao rov za dovod vode u jednu novosagrađenu kuću. Mještanim Muhamed Helić je potvrdio da je i ranije nailazio na slične ostatke starog vodovoda. Njegov rođak Omer, inače publicista koji se zanima starinama svoje mahale (pisao je i o staroj džamiji), smatra da su pronađene cijevi stare više od 150 godina i da je njima nekad bila dovedena voda iz nekoliko stotina metara udaljenih Dervišefendića do-
lova do javne česme na Drafničima. Pronađeni ostaci će svjedočiti o starom drafničkom vodovodu kao eksponati u muzejskoj zavičajnoj zbirci u Gračanici. (izvor: Radio Gračanica).

30. 9. 2020.

Gračanički "Kovan" počeo proizvodnju toplotnih pumpi

Radi se o toplotnoj pumpi za grijanje u kombinaciji s kotlovima na pelet, prvog tog tipa u regiji, čiju je proizvodnju "Kovan" osvojio uz podršku USAID WHAM projekta. "Kovan" već počinje serijsku proizvodnju tih pumpi za koje već ima poznate kupce i narudžbe za tržište Njemačke i Portugala. Realizacijom ovog projekta, zaposlenje dobiva 15 novih radnika, a u "Kovanu" se očekuje povećanje proizvodnje za 15 i izvoza iznad 30%. "Obnovljivi izvori energije su naša budućnost", moto je kompanije "Kovan" MI d.o.o Gračanica.

1.10. 2020.

Vrijedni komunalni projekti u Škahovici: oborinske vode, proširenje puta...

Završena je druga faza proširenja puta i odvođenje oborinskih voda na relaciji Druš-

tveni dom – Bare. Vrijednost projekta je oko 50.000 KM, a sredstva su obezbijeđena iz Budžeta Grada Gračanica, saopštio je predsjedavajući vijeća MZ Škahovica, Vahidin Smajlović (izvor: Gradska uprava).

7. 10. 2020.

Asfaltiranje, asfaltiranje: Donja Orahovica (G. Bajići), Gračanica (Javor i Drafnići)

U naselju Gornji Bajići u Donjoj Orahovici, asfaltirano je 435 metara lokalnog, širine 3 metra. Uloženo je oko 42.000 KM iz gradskog budžeta. Završeno je i asfaltiranje Ulice Kunići – naselje Javor u Gračanici, uloženo oko 23.000 KM budžetskih sredstava. Počelo je i asfaltiranje Ulice Kamenita voda, u naselju Drafnići u Gračanici.

8. 10. 2020.

Dan nakon ponovnog otvaranja Omladinskog centra Gračanica: književno veče sa Mehmedom Đedovićem

Ovo je ujedno i prvi ozbiljniji sadržaj nakon podugačke "suše" na kulturnoj sceni Gračanice, koju je prouzrokovala pandemija. U ugodnom ambijentu, ponovno otvorenih prostorija i pred ograničenim brojem pretežno mladih ljubitelja pisane riječi i uz propisane mjere zaštite od virusa, kroz jedan opuštenu razgovor sa književnikom Mehmedom Đedovićem uspješno je u jednom bloku od sat vremena, predstavljen njegov dosta zanimljiv i raznovrstan književni opus. Moderator književne večeri bila je novinarka Radio Gračanice Elma Čajić, a kao gost u razgovoru je uzeo učešća i prof. dr. Omer Hamzić, koji je kratko predstavio jedan od najboljih romana Mehmeda Đedovića pod naslovom "Legionar", u čijem je nastajanju, kako je rekao, i sam sudjelovao kao konzultant i promotor romana. Đedović je, inače žanrovski raznovrstan i plodan pisac srednje generacije (rođen je 1971.). Piše prozu, poeziju, knjige za djecu, književnu kritiku, ese-

jistiku i novinske tekstove. Dobitnik je više književnih nagrada, od kojih izdvajamo nagrade “Mak Dizdar”, “Skender Kulenović”, zatim godišnje nagrade Društva pisaca BiH itd. Kako smo mogli saznati u ovom razgovoru, pisanjem se bavi preko 30 godina, preveden je na više stranih jezika. Tokom večeri govorio je o svom stvaralačkom postupku, svojoj “književnoj radionici”, kako nastaje pjesma, priča itd. Za pisanje kaže da je to jedini zadatak za koji nema škole, talenat je potreban, ali i mnogo čitanja i rada, za sebe kaže da je postao pisac tek nakon 30 napisanih djela. Tokom večeri uručene su i novčane nagrade za prva dva mjesta i nagrade za druga mjesta za najbolje radove na literarnom konkursu za učenike. Organizatori Susreta su bili Udruženje mladih ANEA-MG i Bosanski kulturni centar Gračanica, pokrovitelj Grad Gračanica, CRS i PRO-budućnost.

9. 10. 2020.

Zbog pandemije, otkazan ovogodišnji gračanički vašar, koji se u zadnjih stotinjak i više godina održava svake godine od 8. do 11. novembra

To je odluka kolegija Gradonačelnika Gračanice Nusreta Helića. Inače, tradicionalni gračanički vašar je oduvijek posjećivao veliki broj izlagača i gostiju, pa je procijenjeno da se ne bi moglo kontrolisati njihovo kretanje u skladu sa uputama i naredbama Kriznog štaba. “Zdravlje građana je prioritet, a tradiciju ćemo, nadamo se, nastaviti već iduće godine u nekim boljim vremenima”, poručio je Gradonačelnik Helić i zamolio građane da i dalje poštuju mjere zaštite kako bismo u Gračanici imali što manji broj zaraženih korona virusom.

14. 10. 2020.

Osam gračaničkih privrednika dobilo poticaj za realizaciju projekta okolišnog i ekonomskog upravljanja

Nakon Javnog poziva Gradske uprave koji je raspisan u okviru projekta okolišnog i eko-

nomskog upravljanja MEG, odobreni su projektni prijedlozi za gračaničke firme “Total Bau”, “Tursun-prom”, “Plastic & Steel”, “School&School”, “Wirac-net”, “Šarm”, “Domadom” i “Zeka comerc”. Ukupna vrijednost projekata svih 6 kompanija sa učešćem Grada i UNDP MEG projektom iznosi: 86.418,00KM. Ono što je najbitnije, kroz projekat će biti zaposleno 37 novih radnika. Alma Softić, vlasnica Centra za edukaciju i strane jezike “School&School” se zahvalila Gradskoj upravi na odabiru njene projektne aplikacije: “Nadam se da ćemo opravdati povjerenje, da ćemo ispuniti sve uslove koji su nam zadati i da će ubuduće za sve druge i mlade i starije poduzetnike biti ovakvih poticaja koji ti daju nadu i ohrabruju, da se neko brine”. (Izvor: Radio Gračanica)

21. 10. 2020.

Potpisan ugovor o kreditnom zaduženju Grada Gračanica od 2 miliona KM za završetak Sportske dvorane “Bazen”.

Nakon što je Gradsko vijeće donijelo odgovarajuće odluke i rješenja, Gradonačelnik Helić je potpisao ugovor sa predstavnikom “Intesa banke”, čime je završena procedura kreditnog zaduženja. Za očekivati je da će to biti dovoljno za konačan završetak gradnje ovog objekta, čiji je kamen temeljac položen prije dvadesetak i više godina.

24. 10. 2020.

Korona ulazi na velika vrata: iz dana u dan raste broj zaraženih u BiH, a crna statistika bilježi rekorde i već premašuje četvorocifreni broj

Uvode se nove mjere ograničenja. Škole u F BiH se ponovo zatvaraju... Za ilustraciju donosimo podatke iz dnevnog izvještaja Kriznog štaba TK: u posljednja 24 sata u Tuzlanskom kantonu testirana su 402 uzorka na korona virus od kojih su 82 pozitivna. U UKC-u su obrađena 382 uzorka (od kojih je 81 pozitivan) a u privatnim poliklinikama 20

(od kojih je jedan pozitivan). Preminule su tri osobe, starije životne dobi, ženskog spola, iz Gradačca, Lukavca i Banovića. Aktivno pozitivne su 654 osobe, u bolnici su 52 osobe od kojih su 3 na respiratoru. Kod kuće se liječe 602 osobe, a pod zdravstvenim nadzorom su 1002 osobe. Novozaraženi su iz Banovića 1, Doboj Istoka 7, Gračanice 5, Gradačca 23, Kalesije 2, Kladnja 3, Lukavca 6, Srebrenika 4, Tuzle 28 i Živinica 3 (2 UKC + 1 PL). Od početka testiranja u TK je registrovano 4106 pozitivnih osoba, umrlo je 175 osoba, oporavilo se 3276 osoba uz jedan premještaj pacijenta u drugi kanton. (Tuzlarije.net)

27. 10. 2020.

Korona: pogoršanje situacije u Bosni i Hercegovini i svim državama u okruženju – zasjedao i Štab civilne zaštite u Gračanici

Novim mjerama od 26. 10. 2020. Federalni štab civilne zaštite naložio je obavezno nošenje maski i na otvorenom, te pripremu svih bolničkih kapaciteta od 30% za covid bolesnike. Na sjednici Gradskog štaba civilne zaštite, predstavnici Doma zdravlja izvijestili su da je u Gračanici trenutno na covid 19 pozitivno 29 osoba, od čega je 8 medicinskih radnika. Zaključeno je da se nastavi provođenje naređenih mjera zaštite, poslata preporuka osobama starije životne dobi, naročito onima sa hroničnim bolestima, da izbjegavaju bespotrebna kretanja i korištenje javnog prevoza, a odgovornim licima da kod organizovanja javnih skupova obezbijede sve predulove za poštivanje svih zaštitnih mjera kao što je nošenje maski, fizičke distance itd. To se posebno odnosi na provođenje preventivnih mjera zaštite učenika, nastavnog i drugog kadra u školama. Preporučeno je svim političkim partijama i kandidatima da izbjegniju organizaciju većih skupova i da se obavezno pridržavaju svih osnovnih higijensko-epidemioloških mjera... U skladu sa naredbama Kriznog štaba Ministarstva zdravstva TK, naređeno je svim zdravstvenim ustanovama

da odmah pristupe uspostavi COVID 19 ambulate, a da svim ostalim pacijentima osiguraju normalno pružanje zdravstvenih usluga uz provođenje svih higijensko-epidemioloških mjera. U skladu sa naredbama Federalnog ministarstva zdravstva obavezuje se Opća bolnica Gračanica da 30% svojih kapaciteta osigura za hospitalizaciju i liječenje pacijenata oboljelih od Covid-19

29. 10 2020.

Održana 17. (posljednja u ovom sazivu) sjednica Gradskog vijeća: usvojen nacrt Budžeta za 2021. godinu

Budžet u 2021. planiran je u iznosu od 15.314.870 KM i sastoji se od: budžetskih sredstava (13.074.770 KM), tekućih kapitalnih grantova i donacija (1.932.000 KM), te namjenska sredstva civilne zaštite (308.100). Po obimu je skoro isti sa planiranim ostvarenjem Budžeta u 2020. godini (15.162.773), što se može smatrati dosta ambicioznim, s obzirom na kontinuiran pad privredne aktivnosti, pa i budžetskih prihoda, koji će se, prema očekivanjima, zbog posljedica pandemije, još drastičnije osjetiti u 2021. godini. Nacrt Budžeta upućen je u javnu raspravu, koja bi trebalo da traje do 10. 12. 2020. godine. Osim Nacrta budžeta, Vijećnici su usvojili još i Nacrt odluke o izvršenju Budžeta za 2021. i Informaciju o realizaciji projekta harmonizacije katastarskih i zemljišnoknjižnih podataka za 8. fazu projekta registracije nekretnina.

29. 10 . 2020.

Vodosnabdijevanje: nakon Prijekog Brda i Donje Lohinje, nova eksploataciona bušotina i u Malešićima na lokaciji Prazine

U toku je mjerenje kapaciteta bušotine, a nakon toga slijede aktivnosti na uključanju novih količina vode u sistem. Bušotina je rađena u okviru projekta WATSSAN koji Grad Gračanica provodi od 2016. godine. Inače, od 2016. do 2018. godine na području Grača-

nice urađeno je ukupno 6 istražnih bušotina, uključujući i tri koje su urađene u ovoj godini. Uskoro počinju istražni radovi i u Lukavici, mjesnoj zajednici koja godinama ima problema sa vodosnabdijevanjem.

6. 11. 2020.

Ni u Gračanici "Korona još ne popušta..."

Prem podacima iz gračaničkog Doma zdravlja, u posljednja dva dana na području Grada potvrđena su 42 slučaja zaraze. Aktivno pozitivnih je 123, a u izolaciji se nalazi 493 osobe, saopćeno je iz gračaničkog Doma zdravlja. U Tuzlanskom kantonu sa jučerašnjim danom evidentirano je 66 novozaraženih osoba na korona virus, a testirano je 206 uzoraka. Najviše novozaraženih je u Tuzli 21, zatim Lukavcu 12, Gračanici 11, Srebreniku osam, Živinicama pet, po dva slučaja u Banovićima i Kladnju, te po jedna novozaražena osoba u Doboj Istoku, Kalesiji, Sapni i Teočaku. U TK trenutno je aktivno zaraženo 2.188 osoba, 163 osobe su hospitalizovane, 12 je na respiratoru, a ostali su u kućnoj izolaciji...

8. 11. 2020.

Po nekim anketama, od tri kandidata za gradonačelnika Gračanice, najviše glasova dobija Mirsad Čamdžić (Naša stranka)

Bez obzir na pandemiju, predizborna kampanja i na području Gračanice se zahuktava i zagrijava. Stranke i pojedinci na listama kao i kandidati za gradonačelnika, svako na svoj način, bore se za svaki glas. Zbog ograničenja koje je nametnula korona, više nego do sada koriste se veb portali, bilbordi i metoda "od uha do uha". Prema rezultatima ankete koju je objavio portal Gračanički.ba (ne navodi se ko je vodio anketu), na pitanje: "Kome dajete svoj glas za gradonačelnika Gračanice", za Mirsada Čamdžića (Naša stranka) glasalo je 37,09% ispitanika, za Davuda Zahirovića (SDA) 33,45% i za Nusreta Helića (SDP) 29,46%.

10. 11. 2020.

Uručena donacija JP "Vodovod i kanalizacija" Općoj bolnici "Dr. Mustafa Beganović" Gračanica

Radi se sredstvima za borbu protiv virusa Covid-19: zaštitna odijela, višenamjenska dezinfekciona sredstva, rukavice i druge potreštine. Donaciju je uručio direktor "Vodovoda" Senad Hamidović.

11. i 12. 11. 2020.

Korona se ne šali: broj zaraženih stalno raste u BiH (oko 1500 novih dnevno), Gračanica dostigla trocifrenu cifru pozitivnih

U Gračanici je 9. 11. potvrđeno 8 novih slučajeva zaraze, a već dva dana kasnije: 18 novozaraženih, 100 aktivno pozitivnih, 301 osoba u izolaciji. Narednog dana (12. 11.) broj novozaraženih smanjen je na 13, tako da je teško upratiti "ritam" zaraze... Zdravstveni sistem je prenapregnut, poduzete mjere ne daju željene rezultate... Krizni štabovi u narednim danima najavljuju uvođenje i drugačijih mjera od trenutno važećih na razini pojedinih kantona ili Federacije BiH. Restriktivnije mjere se, iz puno razloga, očekuju odmah poslije lokalnih izbora.

15. 11. 2020.

Sedmi po redu lokalni izbori u Bosni i Hercegovini – Nusret Helić (SDP) novi/stari gradonačelnik Gračanice

Kako je saopšteno, nakon zatvaranja biračnica, izbori su protekli bez nekih većih problema iako je predizborna kampanja, vođena u nenormalnim uslovima (pandemija) i bila izrazito prljava u cijeloj zemlji. To se odnosi i na područje Grada Gračanice, gdje je dva-tri dana prije predizborne šetnje, aktuelni gradonačelnik i kandidat SDP za gradonačelnika Nusret Helić bio izložen brutalnom pokušaju diskreditacije putem interneta i nekih društvenih mreža, što nije imalo, kako su pokazali rezultati, nikakvog uticaja na opredjeljenje birača. Inače, pu-

noljetni građani Gračanice glasali su na 63 redovna biračka mjesta i jednom biračkom mjestu za glasanje u odsustvu. Na raspolažanju su bila i dva mobilna tima kao i jedan tim za stare i iznemogle osobe. Pravo glasa imalo je 41.430 građana, za glasanje putem pošte registrovano je 450 birača, dok je posredstvom mobilnog tima imalo mogućnost glasati 120 birača. Prema prvim preliminarnim podacima i na područja Gračanice, kao i u drugim gradovima BiH izlaznost je bila jako niska. Tek je oko polovine registrovanih birača izašlo na glasanje i iskoristilo svoje biračko pravo. Cijeni se da na nisku izlaznost nije presudno uticala pandemija, već drugi, mnogo dublji razlozi.

17. 11. 2020.

Denis Huskić, posljednji čuvar tradicije grnčarstva u Gračanici

Ovaj drevni zanat bio je nekad dobro razvijen širom Bosne i Hercegovine, pa i u Gračanici. Stariji još uvijek pamte nekoliko grnčarskih radnji koje su nekad aktivno radile po gračaničkim mahalama Čiriš, Lipa i dr. Bilo je grnčara i po selima oko Gračanice, a najčuvaniji su Delići iz Malešića, čiji potomci, koliko znamo, pokušavaju na svaki način održati tu tradiciju u životu. "Nema više interesovanja, mladi ne žele učiti zanat. Mislim da sam ostao sam i da će sa mnom ovaj zanat i umrijeti. Kod nas su bili kovači, metlari, sitari, užari i svi su ti zanati izumrli jer ih niko nije naslijedio, nisu imali podršku... Nažalost, grnčarstvom se bavi sve manje ljudi u BiH. Izostala je podrška i države i društva." izjavio je za "Gračanički. ba" Huskić, poručivši da ipak, bez obzira na sve, ne gubi nadu jer se od ovog zanata može živjeti. (Gračanički.ba)

22. 11. 2020.

Na Ahiret preselio dr. sc. Kemal Bašić, autor više radova i knjiga o prilikama u Bosni tokom osmanskog perioda

Rođen je 1964. u Hadžićima kod Prijedora, završio je Gazi Husrev-begovu medresu

(1983.), a potom i Islamski teološki fakultet. Magistrirao je na Teološkom fakultetu (İlahiyat Fakültesi) Univerziteta u Ankari, na Odsjeku za povijest islama, 1999. godine, obradivši pitanje veza bosanskohercegovačkih muslimana s Osmanskim carstvom u periodu 1878. - 1918.). Po povratku u Bosnu i Hercegovinu, predavao je islamsku vjeronauku u Gimnaziji "Meša Selimović" u Tuzli, a kraće vrijeme bio je i vanjski saradnik na Odsjeku za historiju Filozofskog fakulteta Univerziteta, gdje je držao nastavu iz osmansko-turskog jezika. Doktorirao je 2018. godine na Filozofskom fakultetu Univerziteta u Sarajevu, na temu "Zvornički sandžak u 17. stoljeću". Bio je jedan od osnivača Centra za osmanske studije, te viši stručni saradnik u Institutu za historiju Univerziteta u Sarajevu. Autor je većeg broja naučnih i stručnih radova, a pojavljivao se i kao prevodilac više tekstova sa turskog jezika. Objavio je tri knjige: "Kozarac kroz historiju" (2005.), "Istaknuti Tuzlaci" (u koautorstvu sa M. Spahićem, 2005.), te studiju "Muhamed Tajib Okić – život i djelo" (2015.). U "Gračaničkom glasniku" objavio je četiri rada, o dvojici istaknutih Gračanlija: "Prof. Muhamed Tajib Okić, život i djelo" (br. 14, 2002.), "Pisana riječ hfz. Ibrahim ef. Mehinagića" (br. 19, 2005.), "Pregled objavljenih radova Muhameda Tajiba Okića u Turskoj" (br. 32, 2011.), te "Historija Bosne i Hercegovine u radovima Muhameda Tajiba Okića objavljenim u Republici Turskoj" (br. 33, 2012.). Sudjelovao je na više naučnih skupova i konferencija, među ostalim i sa zapaženim radom na naučnom skupu "Život i djelo Muhameda Tajiba Okića", koji je održan u Gračanici, 16. 9. 2011. godine u organizaciji Tuzlanskog muftijstva, Općine Gračanica i ovog časopisa. Ukopan je 24. 11. 2020. na mjesnom greblju u Tuzli. Dženaza-namaz je predvodio muftija tuzlanski Vahid-ef. Fazlović, a kratko obraćanje imao je Ismail-ef. Smajlović, direktor Uprave za vjerske poslove Rijaseta Islamske zajednice u BiH.